

Areglo transitorio NPR 2014



Gobierno (País Aruba) y APFA a acorda e forma con lo ehecuta e arreglo transitorio nobo di NPR 2014. Ta trata di un arreglo transitorio nobo bou di e NPR 2014 pa e (ex) participantenan di gobierno y e institucionnan afilia na gobierno, cu a acumula nan pensioen prome cu 1-1-2011 bou di e Ordenansa Nacional di pensioen di empleado publico (PVL). E arreglo transitorio ta ofrece e participantenan aki e posibilidad pa baha cu pensioen adelanta sin deduccion si nan ta cumpli cu cierto rekisitonan

Desde comienzo di 2014 tin un arreglo di pensioen nobo pa e empleadonan di gobierno y institucionnan afilia na gobierno: e Reglamento di Pensioen Nobo (NPR) 2014. E arreglo aki a reemplaza e NPR 2011, cu riba termino largo a muestra di no ta financieramente sostenibel mas. Un di e cambionan mas importante den NPR 2014 ta cu a mara e edad di pensioen na e edad di AOV, cu den 10 año lo aumenta gradualmente te 65 año.

Prome cu e NPR 2011 a drenta na vigor tabata tin e Ordenansa Nacional di pensioen di empleado publico (PVL). Na momento cu e PVL a stop di existi na 2011 a stipula condicionnan di transicion cu tabata aplicabel den e NPR 2011.

Pa largo tempo a papia riba kico lo sosode cu e stipulacionnan transitorio bou di NPR 2011 den NPR 2014. A forma un comision cu a duna su recomendacionnan cu ultimamente a conduci na un acuerdo pa e arreglo transitorio NPR 2014.

E stipulacionnan di transicion ta keda vigente cu un excepcion

Pa e participantenan di e arreglo di PVL anterior tabata conta cu nan lo por baha cu pensioen adelanta cu un par di luna sin deduccion. A cambia e derecho di transicion aki di tal forma cu a scoge e edad di pensioen di AOV di e participante como punto di salida pa calcula e periodo cu e participante lo por baha cu pensioen adelanta sin deduccion. Un condicion importante ta conta cu e edad minimo di pensioen mester ta 60 año.

Den NPR 2014 ainda ta posibel pa baha cu pensioen adelanta, pero no prome cu e edad di 60 año. Aki ta conta cu: mas prome un persona baha cu pensioen, mas abou e pago di pensioen ta bira. Esaki ta pa motibo cu e pensioen ta cuminsa prome y mester paga esaki pa un tempo mas largo.

Pa ken e derecho di transicion adapta ta conta

E posibilidad aki ta conta solamente pa e participantenan anterior di PVL kendenan tabata den servicio di gobierno of un institucion afilia na gobierno. Un otro condicion importante ta cu e dunador di trabou pa cada caso individual mester duna permiso pa haci uso di e posibilidad di bay cu pensioen adelanta sin deduccion.

E cantidad di luna cu un persona por baha cu pensioen sin deduccion, ta wordo calcula a base di e cantidad di año di servicio cu e participante a acumula na pensioen prome cu 2011 den e arreglo di PVL. Pa baha cu pensioen sin deduccion ta conta solamente e añanan den PVL. Pa e añanan di servicio den NPR 2011 y NPR 2014 si ta deduci e pensioen ora cu baha cu pensioen adelanta, mescos cu pa tur e otro participantenan cu ta desea di stop di traha prome. E unico excepcion ta pa e personanan cu den 2011 ya caba a acumula 29 of 30 año di servicio bou di PVL entrante 1 di januari 2011.

Cuater categoria

Den e arreglo di transicion ta distingui cuater categoria di participante a base di e cantidad di año den PVL:

Aña di servicio den PVL te cu 1-1-2011	Na cua momento por baha cu pensioen	Cantidad di luna sin deduccion bou di PVL	Cantidad di luna sin deduccion bou di NPR 2011 y NPR 2014
10 - 20	Edad di AOV kitando luna sin deduccion, pero no prome cu 60 año	0,75 luna pa año te 2011	Ningun
21 - 28	Edad di AOV kitando luna sin deduccion, pero no prome cu 60 año	1 luna pa año te 2011	Ningun
29	Edad di AOV kitando luna sin deduccion, pero no prome cu 60 año	48 luna	48 luna
30	Edad di AOV kitando luna sin deduccion, pero no prome cu 60 año	60 luna	60 luna

Maximo Afl. 30 milyon disponibel pa e arreglo di transicion

APFA lo ehecuta e arreglo di transicion nobo. Den e acuerdo bilateral di 28 di mei 2014 a palabra cu gobierno lo pone un presupuesto maximo di Afl. 30 milyon disponibel pa e uso di e arreglo di transicion. APFA lo calcula e gastonan di e arreglo di transicion NPR 2014 y lo factura e gastonan na gobierno. Na momento cu e gastonan calcula sobrepasa e suma di Afl. 30 milyon lo stop e posibilidad pa haci uso di e arreglo di transicion. Gobierno y e sindicatonan lo evalua e arreglo di transicion anualmente.

Entrega di peticion

Si bo ta desea di haci uso di e arreglo di transicion bo mester entrega un peticion por escrito na APFA 6 luna prome cu bo fecha pa baha cu pensioen adenlanta.

Mas informacion ta disponibel riba website www.apfaruba.org. Tambe bo por tuma contacto cu nos Service Desk Pensioen na 525-2732 of via email servicedesk.pensioen@apfaruba.org.